

## En il Cosovo empè a Mustér

*Iris Probst* ha passentà Nadal e Bumaun en il Cosovo. La vice-pledadra da la Swisscoy avess atgnamain già vacanza ed avess vulì turnar a casa a Mustér. Ma lura ha ella stuì midar plan. Durant l'advent fin sunter Nadal è creschidas las tensiuns al cunfin cun la Serbia. I ha dà bloccadas cun camiuns che han chattà atenziun internaziunala. La tema che las tensiuns sa svilupeschan ad in veritabel conflict è stada gronda. Curt avant Bumaun è la situaziun sa pacifitgada. Per *Iris Probst* è stà dis intensiv. Ella è responsabla per la comunicaziun da la cumpagnia svizra ch'è staziunada en il Cosovo e che sustegna la KFOR, la furmaziun da la NATO che procura per stabilitad en il Cosovo. (fmr/vi) **Pagina 2**

# Ina Sursilvana per la Swisscoy en il Cosovo

A Pristina empè a Mustér ha ella passentà Nadal. *Iris Probst* è vice-uffiziera da pressa ed infurmaziun tar la Swisscoy. Ella ha già bler da far durant ils dis da festa. Pervi da las tensiuns al cunfin tar la Serbia hai dà bieras dumondas da schurnalists.

CLAUDIA CADRUVI/FMR

Il servetsch en il Cosovo dura sis mais. *Iris Probst* (30) è s'annunziada voluntariamain. Trais mais è uss già passads ed entaifer quest temp è creschidas las tensiuns. Durant l'advent ed enturn Nadal hai dà protestas da la minoritad serba. Cun camiuns èsi vegnì bloccà vias als cunfins tar la Serbia.

Las tensiuns han chattà atenziun internaziunala ed ins ha temì ch'il conflict tranter la Serbia ed il Cosovo escaleschia – cunzunt era perquai che la regenza Serba ha dà triev als protestaders. Curt avant Bumaun è la situaziun sa mitigada.

Per *Iris Probst* la vice-uffiziera, responsabla per la comunicaziun externa ed interna tar la Swisscoy (guarda box), èsi stà dis da lavur intensiv.

### «Egls ed ureglias» per eruir l'atmosfera

«Quai na sai jeu betg dir», respunda *Iris Probst* gist sin pliras dumondas da la FMR. Betg ch'i mancass ad ella la savida, anzi, l'armada è simplamain fitg discreta. E quei vala era per la Swisscoy. Sin la dumonda nua ch'ella saja staziunada tradescha ella be «datiers da la chapitala Pristina». Quai vul dir, betg en il nord, betg



La proxima fin d'emna po ella turnar en Svizra e prender sunter las vacanza ch'ella ha stuì spustar – *Iris Probst* è staziunada dapi l'october en il Cosovo.

FOTO MAD

en la regiun nua ch'i dat adina puspè tensiuns cun la minoritad serba.

La Swisscoy ha dus champs en il Cosovo e pliras abitadis en tut il pajais. En lezs vivan ils «Liaison and monitoring teams» che rimnan infurmaziuns. «Quests teams èn ils eglis e las ureglias da la KFOR (guarda box). Els discurren cun glied da differentas gruppas etnicas, cun autoritads ed organisaziuns», explitgescha Iris Probst. Uschia intervegna la KFOR tge problems e tge quitads ch'occupan la populaziun.

### **Dustar minas e dar support a la KFOR**

Èn la Swisscoy e la KFOR stadas decisivas per impedir il december l'escalaziun tranter la Serbia ed il Cosovo? Era tar questa dumonda daventa Iris Probst precauta, pertge la resposta fiss ina valitaziun politica. Ella avisescha perquai pli gugent a la comunicaziun dal Cussegl federal (guarda box).

«Tut ils commembers da la Swisscoy èn scolads co che sa cuntignair en situaziuns fragilas e criticas», di Iris Probst. Perquai haja la Swisscoy pudì cuntinuar sia lavur usitada durant il temp da tensiuns.

Questa lavur è – sper rimnar infurmaziuns en la populaziun – dar support a la KFOR, per exempel cun schuldada da pionier, dus helicopters dal tip Superpuma, cun singula schul-

## **Procurar per stabilitad**

Var 200 schuldads da l'armada svizra sa chattan en il Cosovo. La cumpagnia sa numna Swisscoy. Ella sa participescha dapi il 1999 a la KFOR, la missiun da la NATO per promover la pasch en il Cosovo. 27 stadis tramettan da preschent radund 3700 schuldads a las truppas da la KFOR en il pajais dal Balcan.

Il 2008 ha il Cosovo proclamà sia independenza. La Svizra è stada in dals emprims pajais che ha reconuschì il stadi suveran. En il fratemp reconuschian 115 da 193 stadis da l'ONU il Cosovo. La regenza serba però considerescha il stadi vischin sco provinza autonoma ed animescha las minoritads serbas en il Cosovo da s'opponer.

La regenza actuala da la Serbia mantegna relaziuns stretgas cun la Russia. Gist pervi da la guerra russa en l'Ucraina sajan creschids era ils ristgs da segirezza en ils pajais dal Balcan, scriva il Cussegl federal en ina comunicaziun per maun dal parlament. Perquai less il Cussegl federal schar prolungar il parlament il mandat da la Swisscoy fin il 2026. «La Svizra ha in interess direct per pasch e stabilitad en il Cosovo e l'entira regiun», scriva il Cussegl federal.

U cun auters plets: in conflict sin il Balcan purtass intschertezza a la Svizra ed a l'Uniu europeica – e bliers fugitivs. (fmr/vi)

dada che fa part da la polizia militar internaziunala u in team che dosta minas. Uschia èsi descrit sin la pagina d'internet da la Swisscoy.

### **Creschida si a Mustér**

Iris Probst è creschida si a Mustér. Ella ha studegià politica e relaziuns internaziunals e fatg il master a l'universitad a Durham en l'Engal-

terra. Suentar ha ella lavurà in onn tar Radio-televisiun Svizra Rumantscha.

Avant che partir en il Cosovo ha ella absolvì trais mais ina scolaziun preparativa tar Swissint a Stans, il center da cumpetenzza per schuldada che vegn staziunada en l'exteriur. Dapi l'october è ella en il Cosovo. Ses servetsch dura anc fin l'avrigl.